

- जयपुर मांय व्हेवण वाळा निवेशकां रा कुंभ राइजिंग राजस्थान ग्लोबल इन्वेस्टमेन्ट समिट री उलटी गिनती सरू व्ही— काल ऊं पावणा जयपुर पधारण लागेला ।
- उप राष्ट्रीय पल्स पोलियो अभियान रा तहत काल प्रदेश रा 39 ज़िलां मांय पांच साल तांई रा बच्चां ने पोलियो ऊं बचाव री दवाई री खुराक पायी जावेला ।
- सीमा सुरक्षा बल रा स्थापना दिवस रो राष्ट्रीय समारोह काल जोधपुर मांय—गृह मंत्री अमित शाह ई सिरकत करेला ।
- सोमवार ऊं प्रदेश मांय कई ठौड़ां तेज सर्दी रो दौर सरू व्हेवण रा आसार— सीकर अर माउंटआबू मांय पारो 5 डिग्री सेल्सियस दर्ज करी ज्यो ।

000

जयपुर रा जेईसीसी मांय 9 ऊं 11 दिसम्बर तांई व्हेवण वाळी राइजिंग राजस्थान ग्लोबल इन्वेस्टमेंट समिट री तैयारियां आखिरी दौर मांय चाल रही है । प्रधानमंत्री नरेन्द्र मोदी रो ई निवेश सम्मेलन रो उद्घाटन करण रो कार्यक्रम है । सम्मेलन मांय कई केन्द्रीय मंत्री अर खास पावणा शामिल व्हेला । 12 सत्रां मांय व्हेवण वाळा ई सम्मेलन मांय देश—परदेश रा निवेशक, उद्योगपति अर कारोबारी संगठनां रा नुमाइन्दा सिरकत करेला । ई समिट रा तैत ऊर्जा, पर्यटन अर खनिज समेत न्यारा—न्यारा हलकां मांय 25 लाख करोड़ रुप्या ऊं बत्ता निवेश रा करार करया जा चुक्या है । मुख्यमंत्री भजन लाल शर्मा निवेशकां ने राजस्थान मांय निवेश करण बाबत् राजी करण अर बुलावण सारू ऊर्जा, निर्यात, खनिज, पर्यटन अर एमएसएमई समेत 9 हलकां ऊं जुड़ी नीतियां जारी करण सागे दस दिन तांई रोजीना एक नुवो संकल्प लेवण री पहल कीनी है । सम्मेलन मांय न्यारा—न्यारा देशां रा नुमाइन्दा सागे यूके, कोरिया, जापान, यूएई, सिंगापुर, कतर अर सउदी अरब री खास भागीदारी रहवेला । सम्मेलन मांय सैर—सपाटा रा बारा मांय खास सत्र राख्यो जावेला, जिण मांय देश—दुनिया री पर्यटन अर मेहमान नवाजी हलका री मोटी कंपनियां सिरकत करेला । म्हाणा खबरनवीस बतायो के सम्मेलन री मेजबानी सारू गुलाबी नगर तैयार है ।

000

स्वास्थ्य मंत्री जगत प्रकाश नड्डा देश मांय टी.बी. री बीमारी ने जड़ ऊं खत्म करण रा मकसद ऊं आज 100 दिन रा अभियान री सरूआत कीनी । हरियाणा रा पंचकुला ऊं चलायी ज्यो ओ अभियान 33 राज्यां अर केंद्र रा राज वाळा प्रदेशां रा 347 ज़िलां मांय चलायो जा रह्यो है । ओ अभियान आज प्रदेश मांय ई सरू व्हयो । जयपुर रा सवाई मानसिंह अस्पताल रा सभागार मांय चिकित्सा एवं स्वास्थ्य विभाग री प्रमुख शासन सचिव गायत्री राठौड़ इण री सरूआत कीनी । राज्य मांय ओ अभियान कोटा, बारां, झालावाड, हनुमानगढ अर राजसमंद ज़िलां मांय चलायो जावेला । ई मौके श्रीमती राठौड़ कह्यो के ओ अभियान देश अर प्रदेश मांय टी.बी. री बीमारी ने जड़ ऊं खत्म करण सारू खास जतन है । प्रदेश मांय टी.बी. री बीमारी रो असर खत्म करण सारू आवता साढे तीन महीना तांई सर्वे कर र टी.बी. रा मरीजां री ठां कर र वां रो ईलाज करयो जावेला ।

देशभर रा 347 ज़िलां मांय ओ अभियान चलायो जा रह्यो है । प्रधानमंत्री नरेन्द्र मोदी सोशल मीडिया पोस्ट रे जरिये कह्यो ई खास अभियान ऊं टी.बी. रे खिलाफ देश री लड़ाई और मजबूत बणी है । वे सगळां ऊं टी.बी. री बीमारी खत्म करण बाबत् योगदान देवण री अपील कीनी ।

000

उप राष्ट्रीय पल्स पोलियो महाअभियान काल सरु व्हेला। ई रा तैत प्रदेश रा 39 ज़िलां मांय पांच साल तांई रा बच्चां ने पोलियो री बीमारी ऊं बचाव री दवाई पायी जावेला। इण ऊं पैली प्रदेश मांय आज झालावाड़ अर दूजी ठौड़ां जागरूकता रैली निकाळ र ई अभियान रो प्रचार करी ज्यो। स्वास्थ्य विभाग मांय टीकाकरण परियोजना रा निदेशक बतायो के ई अभियान रा तैत 87 लाख बच्चां ने पोलियो री बीमारी ऊं बचाव री दवाई पावणे तैय करी ज्यो है। ई अभियान रा सारु 46 हजार 887 बूथ बणायी ज्या है अर 60 हजार पार्टियां बणायी ज्यी है।

000

लोकसभा अध्यक्ष ओम बिरला कह्यो है के दिव्यांगजन रो देश री बरकत मांय खास काम है अर सबका साथ सबका विकास सबका विश्वास सबका प्रयास रा तहत वां री भागीदारी खास है। वे गुडगांव मांय 11वीं नेशनल कॉन्फ्रेंस ऑन डिसेबिलिटी अर राष्ट्रीय एंबिलेपिंक्स होड़ रा उद्घाटन रे मौके बोल रह्या हा। वे कह्यो के दिव्यांगजन मांय अपार बूतो अर लगन व्हे है अर वां ने उचित प्लेटफॉर्म मिलणो चाहिजे। लोकसभा अध्यक्ष सांसदां ऊं आप-आप रा हलका मांय दिव्यांगजन रा हुनर ने उचित मंच देवण री अरज कीनी।

0000

मुख्यमंत्री भजनलाल शर्मा देश मांय 85 नुवा केंद्रीय विद्यालय खोलण री मंजूरी सारु प्रधानमंत्री नरेन्द्र मोदी रो आभार जतायो है। वे कह्यो के केन्द्रीय केबीनेट रा ई फैसला ऊं राज्य मांय ई नौ और केन्द्रीय विद्यालय खुलेला। वे कह्यो के इण ऊं राज्य रा विद्यार्थियां सारु चोखी भणायी लिखाई रा मौका बधेला।

0000

गृह मंत्री अमित शाह रो आज जोधपुर पधारण रो कार्यक्रम है। वे काल सीमा सुरक्षा बल-बीएसएफ रा स्थापना दिवस ज़ल्सा मांय सिरकत करेला। बीएसएफ रा राजस्थान फटियर रा आईजी एम एल गर्ग बतायो के पहली दफ़ा बीएसएफ रा स्थापना दिवस रो राष्ट्रीय कार्यक्रम जोधपुर मांय राख्यो जा रह्यो है। ज़ल्सा मांय बीएसएफ रा देशभर रा फन्टियर मुख्यालय रा जवान हिस्सो लेवेला।

000

आज सशस्त्र सेना झंडा दिवस है। ई मौके प्रधानमंत्री नरेन्द्र मोदी कह्यो के ओ दिन देश रा फौजियां री बहादुरी अर बलिदान रो मान करण रो दिन है। वे जनता ऊं सशस्त्र सेना झंडा दिवस कोष मांय अंशदान देवण बाबत कह्यो। रक्षा मंत्री राजनाथ सिंह ई भारतीय सशस्त्र बलां री हिम्मत, बहादुरी, धीरज अर बलिदान ने नमन कीनो। वे कह्यो के ओ भारत रा सशस्त्र बलां री हिम्मत अर योगदान ने याद करण रो दिन है।

-----

रक्षा मंत्री देश री हिफाजत मांय खास काम करण सारु फौज री सराहवणा करता थकां सगळां ऊं सशस्त्र सेना झंडा दिवस कोष मांय योगदान देवण री अपील कीनी। देश 7 दिसंबर 1949 ऊं सशस्त्र सेना झंडा दिवस मना रह्यो है। प्रदेश मांय ई ई मौके न्यारा-न्यारा कार्यक्रम राख्यी ज्या। जयपुर मांय जूनी जीपां रो रैली निकाळी ज्यी अर अमर जवान ज्योति माथे फूल चढ़ाई ज्या। बाड़मेर मांय पैळी वाळा फौजियां अर वीरांगनावां रो मान करी ज्यो। जालौर माय साईकिल रैली निकाळी ज्यी।

000

राज्यपाल हरिभाऊ बागडे नौजवानां ऊं नौकरियां हासिल करण री बजाए नौकरियां देवण वाळा बणबा सारु कह्यो है। वे आज जयपुर मांय एक गैर सरकारी विश्वविद्यालय रा दीक्षांत समारोह मांय बोल रह्या हा। राज्यपाल कह्यो के विश्वविद्यालय ज्ञान रा केन्द्र व्हे है अर जीवण रो तरीको बतावे है। वे कह्यो के विश्वविद्यालयां कानी ऊं नौजवानां मांय उद्यमिता री सोच विकसित करण माथे ई खास ध्यान दियो जावणो चाहिजे। राज्यपाल राष्ट्र प्रथम री सोच सागे विद्यार्थियां रा दिमागी बूता ने बधावण माथे ई जोर दीनो।

000

प्रदेश मांय सोमवार ऊं केई ठौड़ां तेज ठण्ड पड़बा रा आसार है। कठे—कठे शीत लहर चालण री ई संभावना है। ई बीचे लारला 24 घंटा मांय राज्य रा कुछ हलकां मांय सर्दी रो असर बध ग्यो। लारली रात 16 ठौड़ां पारो 10 डिग्री सेल्सियस ऊं नीचे उत्तर ग्यो। सीकर अर माउटआबू मांय रात री बगत तापमान 5 डिग्री सेल्सियस दर्ज करी ज्यो। चुरु मांय 5 दशमलव 6, पिलानी मांय 6 दशमलव 3, अलवर मांय 6 दशमलव 6 अर जालौर अर करौली मांय 7 दशमलव 9 डिग्री सेल्सियस तापमान रह्यो। मौसम केन्द्र जयपुर रा निदेशक राधेश्याम शर्मा बतायो के सोमवार ऊं शोखावटी हलका अर उत्तराद ज़िला मांय सीळो बायरो बाजण रा आसार है।

000

पाली ज़िला मांय रानी रा सामुदायिक स्वास्थ्य केन्द्र मांय आज खास स्वास्थ्य शिविर लगायी ज्यो। मुख्यमंत्री शहरी रोज़गार गारंटी योजना रा तहत लगायी ज्या ई शिविर मांय मजूरां री स्वास्थ्य जांच करी ज्यी अर जरुरी दवाइयां वाला चिकित्सा किट दिया ज्या।

000